

Mesiras obligatorias per franar ils custs

Dus onns suenter che l'iniziativa è vegnida acceptada, vegn examinà il svilup dals custs. Sche l'augment dals custs importa passa 20 pertschient da l'augment da las pajas e sch'ils partenaris tariffars n'han preni naginas mesiras fin lura, ston la Confederaziun ed ils chantuns concluder mesiras per franar ils custs. L'onn suandant ston las mesiras far effect. Quant fitg ch'ils custs dastgan s'augmentar a lunga vista, sto il parlament fixar en la lescha.

La lescha regla la realisaziun

En il text da l'iniziativa na vegni betg declarà pli detagliadain, co ch'il frain dals custs e las mesiras, che la Confederaziun ed ils chantuns ston prender per franar ils custs, duain vegnir concepids. Il parlament sto reglar quai en la lescha.

Motivs per l'augment dals custs

L'augment dals custs da sanadad ha plirs motivs. Primo s'augmenta il dumber da persunas pli veglias ed uschia er il dumber da persunas cun malsognas cronicas, che dovran dapli tractaments medicinals. En la vegliadetgna resultan perquai dapli custs da sanadad.¹ Fin l'onn 2050 dastgass il dumber da persunas sur 80 onns pli che sa dublegiar en Svizra.² Secundo pon progress medicinal e tecnologic augmentar ils custs, perquai ch'i dat pli bleras e megrras pussaivladads da terapia e perquai che quellas vegnan er duvradas pli savens. Sco terz cuntegna il sector da sanadad duplicitads, fauss impuls e structurass ineffizientas, cun la consequenza ch'i dat blers tractaments che n'èn betg inditgads ord vista medicinala. Stimaziuns partan qua d'in potenzial da spargn da pliras milliardas francs.³

- 1 Uffizi federal da sanadad publica: Statistik der obligatorischen Krankenpflegeversicherung 2022 (STAT KV 22), T 2.06 Bruttoleistungen nach Altersklasse und Geschlecht ([bag.admin.ch](https://www.bag.admin.ch) > Zahlen und Statistiken > Krankenversicherung: Statistiken > Statistik der obligatorischen Krankenpflegeversicherung).
- 2 Uffizi federal da statistica (2020): Szenarien zur Bevölkerungsentwicklung der Schweiz, 2020–2050, p. 12 ([bfs.admin.ch](https://www.bfs.admin.ch) > Statistiken finden > Bevölkerung > Zukünftige Entwicklung > Schweiz-Szenarien > Publikationen).
- 3 Winterthurer Institut für Gesundheitsökonomie ZHAW ed INFRAS (2019): Effizienzpotenzial bei den KVG-pflichtigen Leistungen ([bag.admin.ch](https://www.bag.admin.ch) > Versicherungen > Krankenversicherung > Laufende Revisionsprojekte > KVG-Änderung: Vorgabe von Kostenzielen > Dokumente).

Mesiras dal Cussegl federal per franar ils custs

Las cumpetenzas en il sector da sanadad èn repartidas sin la Confederaziun e sin ils chantuns. Ils chantuns èn per exempel responsabels per admetter las medias ed ils medis u per fixar il dumber d'ospitals. En ses champ da cumpetenza ha la Confederaziun prenià ils ultims onns mesiras che han sbassà ils custs per plirs tschients milliuns francs per onn, per exempel reduziuns dals pretschs da medicaments u in'adattaziun da las tariffas per analisas da labor u per prestaziuns medicinalas ambulantas. L'onn 2018 ha il Cussegl federal plinavant concludì dus vasts pachets per franar ils custs e proponì 16 mesiras al parlament. Intginas da questas mesiras èn vegnidas approvas e realisadas, autras vegnan actualmain anc discutadas en il parlament.

Cuntraproposta indirecta

Il Cussegl federal ed il parlament refusan l'iniziativa. Els han dentant elavurà ina cuntraproposta indirecta sin il stgalim da la lescha. Tenor questa cuntraproposta fixass il Cussegl federal, quant fitg ch'ils custs da l'assicuranza obligatorica da malsauns dastgassan s'augmentar maximalmain. Ils acturs dal sector da sanadad stuessan l'emprim motivar, pertge e quant fitg ch'ils custs vegnissan a s'augmentar en mintga sector. Quai purtass dapli trasparenza. Sch'ils custs s'augmentassan pli fitg che fixà, stuessan il Cussegl federal ed ils chantuns examinar mesiras per curreger quai. La cuntraproposta entra en vigur, sche l'iniziativa vegn refusada e sche la cuntraproposta na vegn betg cumbattida cun success tras in referendum.

Arguments

Comité d'iniziativa

Dapi onns creschan las premias da las cassas da malsauns. La culpa è l'augment illimità dals custs da sanadad. Perquai pretenda l'iniziativa ch'ils custs da sanadad vegnian franads. Ella oblighescha tut ils acturs – saja quai chantuns, ospitals, medis, cassas da malsauns u l'industria farmaceutica – da sa cunvegner a mesiras per reducir ils custs, sch'ils custs da sanadad creschan memia fitg cumpareglià cun las pajas. Mo uschia pudain nus franar duraivlamain l'augment da las premias.

Da tge sa tracti?

Las premias da las cassas da malsauns creschan dapi onns ed engrevgeschan pli e pli fitg nossa bursa. Fin 15 000 francs: uschè bler paja oz ina famiglia da quatter persunas mintga onn per la cassa da malsauns. L'explosiun da las premias è dentant mo in spievel dals custs creschents en il sector da sanadad. Per schliar duraivlamain il problem dovri ussa in frain dals custs.

Co funcziuna quest frain dals custs?

Il frain dals custs funcziuna sco il frain a l'indebitament cumprovà da la Confederaziun. Sch'ils custs da sanadad creschan entaifer in onn 20 % pli fitg che las pajas, prenda la Confederaziun, ensemen cun tut ils acturs, mesiras per sbassar ils custs. Tranter l'onn 2010 e l'onn 2020 èn ils custs da sanadad en l'assicuranza da basa creschids en media per 3 % per onn, entant che las pajas èn s'augmentadas mo per 0,7 %. Ils custs èn pia creschids 400 % pli fitg che las pajas ed importan oz, en il sector obligatoric, passa 30 milliardas francs per onn.

Tgeninas èn las mesiras concretas?

Tenor in rapport d'experts da la Confederaziun pudess ins spargnar gia oz 6 milliardas francs per onn en il sector obligatoric, e quai senza perditas da qualitad. L'incarica fiss clera: tut ils acturs ston sa cunvegner a mesiras liantas, sch'ils custs creschan pli fitg che quai che l'iniziativa prevesa. Cun l'iniziativa vegn stgaffida la basa costituziunala necessaria.

Effect disciplinant

Il sistem actual cuntegna ina massa fauss impuls. Il sector da sanadad è numnadamain l'unic lieu, nua ch'ils acturs fixeschan sezs il pretsch e determineschan, quantas prestaziuns ch'els mettan a quint. Il frain dals custs è l'unica via per cuntanscher ina conscienza per ils custs en il sector da sanadad.

Ston ins temair raziunaments?

Na. Anzi: l'iniziativa vul che tut ils acturs surpiglian final-main responsabladad per l'explosiun dals custs e ch'il cumbat da repartiziun intern a quint da las persunas che pajan premias prendia ina fin. Entant che las medias da chasa, ils medis d'uf-fants e las tgirunzas portan gia oz las grevezas dal sistem, s'enritgeschan auters senza turpetg.

Ston ins temair ina reducziun da prestaziuns?

Na. Nus vulain vinavant il meglier sistem da sanadad dal mund. Cun custs totals da bunamain 90 milliardas francs per onn stoi esser pussaivel da porscher a la populaziun in provediment medicinal bun e pajabel ch'è accessibel a tuts.

Recumandaziun dal comité d'iniziativa

Perquai recumonda il comité d'iniziativa:

Gea

 <https://kostenbremse-jetzt.ch>

Arguments

Cussegl federal e parlament

Las premias da las cassas da malsauns creschan ed engrevgeschan uschia pli e pli fitg las persunas cun entradas bassas e mesaunas. In frain dals custs, sco ch'el vegn pretendì da l'iniziativa, è dentant memia pauc flexibel. I dat numnadamain motivs plausibels, pertge ch'ils custs s'augmentan, sco per exempel la vegliadetgna creschenta da la populaziun u progress medicinal. Cuntrari a l'iniziativa resguarda la cuntraproposta dal Cussegl federal e dal parlament quests facturs. Il Cussegl federal ed il parlament refusan l'iniziativa cunzunt per ils suandants motivs:

Dretga diagnosa, fauss med

L'iniziativa tracta in problem impurtant: ils custs da l'assicuranza obligatorica da malsauns creschan memia fitg. I existan structurass ineffizientas, ed i vegnan fatgs dapli tractaments che quai che fiss inditgà ord vista medicinala. L'iniziativa è dentant memia pauc flexibla: l'augment dals custs ch'è permess vegn collià unilateralmain cun il svilup da las pajas e da l'economia. Motivs plausibels per l'augment dals custs na vegnan uschia betg resguardads, per exempel il progress medicinal u la populaziun che vegn pli e pli veglia.

I dovra concepts differenziads

En in sector uschè central sco il provediment da la sanadad èsi impurtant da proceder tant sco pussaivel en moda differenziada. Tut tenor la realisaziun da l'iniziativa ristgan ins ch'il svilup dals custs vegnia restrenschi memia fitg. Uschia pudessi capitar, che tractaments necessaris n'avessan betg pli lieu u na vegnissan betg realisads svelt avunda. La qualitat dal provediment medicinal da la populaziun pudess sa diminuir.

Betg resguardà che la populaziun vegn pli e pli veglia

En la vegliadetgna resultan dapli custs da sanadad, per exempel pervia da malsognas cronicas sco cancer u diabetes. En ina societad cun glieud pli e pli veglia creschan damai ils custs da sanadad. Quai sto vegnir resguardà. L'iniziativa negligescha dentant quai.

Betg resguardà il progress medicinal

La medischina ha fatg progress enorms ils ultims decennis. Malsognas ch'eran pli baud incurablas, pon vegnir tractadas oz cun success. Da questas pussaivladads da terapia novas e savens charas na vul nagin desister. L'iniziativa ignorescha quest progress.